




初唐四傑集
 王子安集
 乙

初唐四傑集
 十


土岐文庫
 文庫17
 W54
 2



文章 17
W54
2



王子安集卷六

序

晚秋遊武擔山寺序

若夫虎邱仙鎮吳王殉歿之墟驪嶠崇基秦帝升遐之
宅雖珠衣玉匣下賁窮泉而廣岫長林終成勝境亦有
霍將軍之大隧迴寫祁連樗里子之孤墳竟開長樂豈
如武擔靈嶽開明故地蜀夫人之葬迹任文公之死所
岡巒隱隱化為闔岷之峰松柏蒼蒼卽入祇園之樹引
星垣於沓嶂下布金沙樓日觀於長岷傍臨石鏡瑤臺

鼓雅居

昭和六十年二月一日
王岐善唐氏寄贈

010185197341

玉甃尚控霞宮寶刹香壇猶芬仙闕瑤櫳接映臺凝夢
渚之雲壁題相輝殿寫長門之月美人虹影下綴虬
少女風吟遙喧鳳鐸羣公以玉律豐暇徭林壑而延情
錦署多閒想巖泉而結興於是披桂幌歷松扉梵筵霞
屬禪扃烟敞雞林俊賞蕭蕭鷺嶺之居鹿苑高談疊疊
龍宮之偈于時金方啟序玉律驚秋朔風四面寒雲千
里層軒迴霧齊萬物於三休綺席乘雲窮九垓於一息
碧雞靈宇山川極望石兕長江汀洲在目龍鑣翠轄駢
闐上路之遊列榭崇闈磊落名都之氣渺渺焉洋洋焉
信三蜀之奇觀也昔者升高能賦勝事仍存登嶽長謠
清標未遠敢攀盛烈下揆幽襟庶旌西土之遊遠嗣東
平之唱云爾

宇文德陽宅秋夜山亭宴序

若夫龍津宴喜地切登仙鳳閣元虛門稱好事亦有登
山臨水長想巨源明月清風每思元度未有能星馳一
介留美跡於芳亭雲委八行抒勞思於彩筆遂令啟瑤
緘者攀勝集而長懷披瓊翰者仰高筵而不暇王子猷
之觸興不覺浮舟嵇叔夜之相知欣然
為琴樽佳賞

始詣臨邛口腹良遊未辭安邑乃知兩鄉投分林泉可
攘袂而遊千里同心烟霞可傳檄而定友人河南宇文
嶠清虛君子中山郎餘令風流名士或三秋意契闢林
院而開襟或一面新交叙風雲而倒屣彭澤陶潛之菊
影泛仙樽河陽潘岳之花光懸妙理巖巖思壁家藏虹
岫之珍森森言河各控驪泉之寶偶同金碧暫照詞場
巴漢英靈潛光翰院疊疊焉蕭蕭焉信天下之奇託也
于時白藏開序青女御律金風高而林野動玉露下而
江山清琴亭酒榭磊落乘烟竹徑松扉參差向月魚鱗

積磴還昇蘭桂之峰鴛翼分橋卽映芙蓉之水亦有紅
蘋綠荇亘渚連翹玉帶瑤華分楹間植池簾夕敞香牽
十步之風岫幌宵寒氣襲三危之露縱冲襟於俗表留
逸契於人間東山之賞在焉南澗之情不遠夫以中牟
馴雉猶嬰觸網之悲單父歌魚罕繼鳴琴之趣俾夫一
同詩酒不撓於牽絲千載巖溪無慚於景躅一作燭云爾

遊冀州韓家園序

銅溝水北石鼓山東星辰當畢昴之墟風俗是唐虞之
國雖接燕分晉稱天子之舊都而向術當衢有高人

甲第祥風塞戶瑞氣沖庭芳酒滿而綠水春朗月閒而
素琴薦家童掃地蕭條仲舉之園長者盈門廓落東平
之室梧桐生霧楊柳搖風眺望而林泉有餘奔走而烟
霞足用神龍起伏俱調鼎鑊之滋鳴鳳雌雄並入笙箏
之奏高情壯思有抑揚天地之心雄筆奇才有鼓怒風
雲之氣南庭興晚東徑陰生石髓拆而隱士歸玉山崩
而野人醉僉爲文在我卜翰苑當仁王羲之之蘭亭五
百餘年直至今人之賞石季倫之梓澤二十四友始得
吾徒之遊陶陶然落落然則大唐調露之元年獻歲正
月也

夏日宴張二林亭序

張二官松駕乘閒桂筵追賞引簪裾之勝侶狎邱壑之
神交辯縱於解頤道深於喻指香杯濁醴是河朔之平
生雄筆清詞得高陽之意氣林亭曠望季倫調妓之園
泉石周游子晉登仙之浦舟浮葉影簞積花文黃鵲度
而鷗驚丹鳥傾而日晚出處之情一致筌蹄之義兩忘
沈轄留驥眺乘羊於衛玉揮毫可作明擲地於孫金共
題橫吹之篇用記茲辰之樂人採一字四韻成篇

夏日宴宋五官宅觀畫幃序

宋五官芝庭襲譽盛文史於三冬桂幄凝權照綺羅於九夏樽浮綠蟻每披仙霧之文障列青牛更寫行雲之態爾其龍編繡質鴛錦分花隱映樓臺比牕簾之在且參差花葉若桃李之恒春楚媛調絃韓娥對酒虹橋度幔鵲鏡臨妝佩引琅玕詎動懷風之韻鞍迴玳瑁唯奔逐日之姿魚鳥冷而相親泉石紛而在翫宋家斯近雖別謝於登垣秦氏未遙自堪留於駐馬驚鴻擅美丹青貴近質之奇吐鳳標華宮徵得緣情之趣遞揚筆妙式

暢辭端

秋日宴季處士宅序

若夫爭名於朝廷者則冠蓋相趨迹於邱園者則林泉見託雖語默非一物我不同而逍遙皆得性之場動息匪自然之地故有季處士者遠辭濠上來遊鏡一作境中披白雲以開筵俯青溪而命酌昔時西北則我地之琳瑯今日東南乃他鄉之竹箭又此夜乘槎之客猶對仙家坐菊之賓尚臨清賞既而依稀舊識歡吳鄭之班荆樂莫新交申孔程之傾蓋向時朱夏俄涉素秋金風

生而景物清白露下而光陰晚庭前柳葉纔聽蟬鳴野
外蘆花行看鷗上數人之內幾度琴樽百年之中少時
風月蘭亭有昔時之會竹林無今日之歡丈夫不縱志
於生平何屈節於名利人之情矣豈曰不然人賦一言
各申其志使夫千載之下四海之中後之視今知我咏
懷抱於茲日

春日孫學士宅宴序

若夫懷放曠寥廓之心非江山不能宣其氣負鬱快不
平之思非琴酒不能洩其情則林泉爲進退之場樽罍
是言談之地白衣送酒青陽在節待雁亂而江湖春梅
柳開而庭院晚楚屈平之瞻望放於何之王仲宣之登
臨魂兮往矣俠客時有且傾鸚鵡之杯文人代興聊舉
麒麟之筆人采一字四韻成篇

與員四等宴序

自嵇阮寂寥尹班超忽高筵不嗣中宵誰賞古今惜芳
辰者停鶴軫於風衢懷幽契者佇鸞觴於月徑已矣哉
林壑遂喪烟霞少對良會不恒神交復幾請沃非常之
思但宣絕代之遊託同志於百齡求知已於千載道之

存矣無乃然乎人賦一言俱裁四韻

夏日諸公見尋訪詩序

天地不仁造化無力授僕以幽憂孤憤之性稟僕以耿
介不平之氣頓忘山岳坎坷於唐堯之朝傲想烟霞顧
頽於聖明之代情可知矣賴乎神交勝友得山澤之虬
龍隱路幽居降雲霄之鸞鳳楊公沈公行之者仁義禮
智用之者乾元亨利元經苦而白鳳翔素牒開而紫鱗
降金門待詔謁天子於朝廷石室尋真訪下走於邱壑
幽人鳧士非無北壁之書隱者迎賓自有西山之饌席

門蓬巷竹高士之來遊叢桂幽蘭喜王孫之相對山南
花圃澗北松林黃雀至而清風生白鶴飛而蒼雲起停
琴綠水仲長統之歡娛置酒青山郭子期之賓客人探
一字四韻成篇

仲氏宅宴序

僕不幸在流俗而嗜烟霞恨林泉不比德而嵇阮不同
時處良辰而鬱快仰高風而杼軸者多矣豈夫司馬卿
之車騎上客盈門仲長統之園林羣英在席坐卧南郭
蕭條東野江波浩曠晴山紛積喜鴛鴦之接翼曜江漢

之多才顧斜景而危心瞻火雲而變色思傳勝餞敢振
文鋒蓋同席者高人薛曜等耳盍各賦詩放懷叙志俾
山川獲申於知己烟霞受制於吾徒也

江寧吳少府宅餞宴序

蔣山南望長江北流伍胥用而三吳盛孫權困而九州
裂遺墟舊壤數萬里之皇城虎踞龍盤三百年之帝國
闕連石塞地實金陵霸氣盡而江山空皇風清而市朝
改昔時帝險嘗爲建業之雄都今日太平卽是江寧之
小邑吳生俊宋甫佐烹鮮我輩良游方馳去鷁梁伯鸞

之遠逝自有長謠閔仲叔之遐征仍逢厚禮臨別浦枕
離亭陣雲四面洪濤千里簾帷後闌竹樹映而秋烟生
棟宇前臨波潮驚而朔風動嗣宗高嘯綠軫方調文舉
清談芳樽自滿想衣冠於舊國便值三秋憶風景於新
亭俄傷萬古情窮興洽樂極悲來愴零雨於中軒動流
波於下席嗟乎九江爲別帝里隔於雲端五嶺方踰交
州在於天際方嚴去舳且對窮途玉露下而蒼山空他
鄉悲而故人別請開文囿共瀉詞源人賦一言俱題四
韻

還冀州別洛下知己序

東西南北某也何從寒暑陰陽時哉不與河陽古樹無
復殘花合浦寒烟空驚墜葉王生賣藥入天子之中都
夏統乘舟屬羣公之大會風烟而地車馬如龍鐘鼓沸
天美人似玉芳筵交映旁徵豹象之胎華饌重開直挾
蛟龍之髓季鷹之思吳命駕果爲秋風伯鸞之適越登
山以求淥水辭故友謝時人登鄂坂而迂迴入邛山而
奔走何年風月三山滄海之春是處風花一曲青溪之
路賓鴻逐暖孤飛萬里之中仙鶴隨雲直去千年之後
悲夫光陰難再子卿殷勤於少卿風景不殊趙北相望
於洛北鴛鴦雅什俱爲贈別之資鸚鵡奇杯共盡忘憂
之酒

春夜桑泉別王少府序

下官以窮途萬里動脂轄以長驅王公以傾餞百壺別
芳筵而促興是以青陽半序明月中宵離亭擁花草之
芳別館積琴歌之思去留歡盡動息悲來惜投分之幾
何恨知音之忽間他鄉握手自傷關塞之春異縣分襟
竟切悽愴之路旣而星河漸落烟霧仍開高林靜而霜

鳥飛長路曉而征驂動含情不拜空佇聽於南昌揮涕
無言請投文於西候因探一字四韻成篇

番禺沈葆和初校

南海廖廷相覆校

王子安集卷六

王子安集卷七

序

秋日楚州郝司戶宅餞崔使君序

上元二載高旻八月人多汴北地實淮南海氣近而蒼
山陰天光秋而白雲晚川塗所亘郢路極於崑潼風壤
所交荆門洎於吳越憑勝地列雄州城池當要害之衝
寮案盡鵷鸞之選昌亭旅食悲下走之窮愁山曲淹留
屬羣公之宴喜披鶴霧陟龍門故人握手新知滿目飲
崔公之盛德果遇攀輪慕郝氏之高風還逢解榻接衣

簪於座右駐旌棨於城隅臨風雲而解帶眄江山以揮
涕巖楹左峙俯映元潭野逕斜開傍連翠渚青蘋布葉
亂荷芰而動秋風朱草垂榮雜芝蘭而涵晚液艤仙舟
於石岸薦綺席於沙場賓友盛而芳樽滿林塘清而上
筵肅琴歌迭起俎豆駢羅烟霞充耳目之翫魚鳥盡江
湖之賞情盤樂極日暮途遙思染翰以凌雲願麾戈以
留景嗟乎素交爲重覺老幼之同歸朱紱儻來豈榮枯
之足道且欣風物共悅濠梁齊天地於一指混飛沈於
一貫嗟乎此歡難再慙勤北海之筵相見何期惆悵南

溟之路請揚文筆共記良遊人賦一言俱成四韻云爾

秋晚入洛於畢公宅別道王宴序

不官才不曠俗識不動時充皇王之萬姓預乾坤之一
物早師周禮偶愛儒宗晚讀老莊動諧真性進非干物
自疎朝市之機退不邀榮誰識王侯之貴散琴樽於北
阜喜耕鑿於東陂野老披荷暫辭幽澗山人賣藥忽至
神州驚帝室之威靈偉皇居之壯麗朝遊魏闕見軒冕
於南宮暮宿靈臺聞絃歌於北里交情獨放已厭人間
野性時違少留都下道王以天孫之重分曲阜之新基

畢公以帝室之華擁平陽之舊館迹塵鐘鼎思在江湖
居榮命於中朝接風期於下士綠縢朱紱且混以蘿裳
列榭崇軒坐均於蓬戶賓主繇其莫辨語默於是同歸
終賢王之樂善備將軍之揖客是日也雲繁雨驟氣爽
風馳高秋九月王畿千里高局向術似元禮之龍門甲
第臨衢有當時之驛騎英王入座牢醴還陳高士臨筵
樵蘇不爨是非雙遣自然天地之間榮賤兩忘何必山
林之下元談清論泉石縱橫雄筆壯詞烟霞照灼旣而
神馳象外宴洽寰中白露下而南亭虛蒼烟生而北林
晚鷓鴣始望不及牲牢麋鹿長懷非忘林藪先生負局
倦城市之塵埃遊子橫琴憶汀洲之杜若況乎迹不皆
遂時不再來屬宸駕之方旋值羣公之畢從洛城風景
此會無期戚里笙竽浮歡易盡仰雲霞而道意捨塵事
而論心夏仲御之浮舟願乘春水張季鷹之命駕思動
秋風策藜杖而非遙整柴車之有日青溪數曲幽人長
往白雲萬里帝鄉難期安貞抱朴已甘心於下走全忠
履道是所望於羣公倘心迹克諧去留咸遂廟堂多暇
返身滄海之隅軒冕可辭迴首箕山之路尋赤松而見

及泛黃菊以相從雖源水桃花時時失路而幽山桂樹
往往逢人庶公子之來遊幸王孫之畢至茅君待客自
有金壇王烈迎賓還開石架惟恐一邱風月侶山水而
忘年三徑蓬蒿待公卿之來日對光陰之易晚惜雲霧
之難披羣公葉縣鳧飛入朝廷而不出下走遼州鶴去
謝城闕而依然敢抒重襟爰疏短引式命離前之筆希
存別後之資凡我故人其辭云爾

越州永興李明府宅送蕭三還齊州序

嗟乎不游天下者安知四海之交不涉河梁者豈識別
離之恨薜衣松杖琴樽爲得意之親臨遠登高烟霞是
賞心之事有梁孝王之下客僕是南河之南孟嘗君之
上賓予在北山之北幸屬一人作寰中之主翛然四皓
爲方外之臣俱游萬物之間相遇三江之表許元度之
清風朗月時慰相思王逸少之修竹茂林屢陪歡宴加
以惠而好我攜手同行或登吳會而聽越吟或下宛委
而觀禹穴良談落落金石絲竹之音徽雅致飄飄松柏
風雲之氣狀當此時也嘗謂連璧無異鄉之別斷金有
好親之契生平於張范之年齊物於惠莊之歲三光迴

薄未殫投分之情四序循環詎盡忘言之道豈期我留
子往樂去悲來橫咽水而東西緒愁雲於南北況乎泣
窮途於白首白首非臨別之秋嗟歧路於他鄉他鄉豈
送歸之地蓐收戒序少昊司晨清風起而城闕寒白露
下而江山遠徘徊去鶴將別葢而同飛斷續來鴻共離
舟而俱泛古人道別動便經年今我言離會當何日山
巨源之風猷令望善佐朝廷嵇叔夜之潦倒麤疎甘從
草澤行當山中攀桂往往思仁野外紉蘭時時佩德人
非桃李豈得無言子是簫韶當須振響勉酌傷離之酒
具陳感別之辭各賦一言俱題六韻

秋夜於綿州羣官席別薛昇華序

夫神明所貴者道也天地所寶者才也故雖陰陽同功
宇宙勦力山川崩騰以作氣星象磊落以降精終不能
五百年而生兩賢也故曰才難不其然乎今之羣公並
受奇彩各仗異氣或江海其量或林泉其識或簪裾其
跡或雲漢其志不可雙得也今並集此矣豈英靈之道
長而造化之功倍乎然僕之區區常以爲人之百年猶
如一瞬非不知風月不足懷也琴樽不足戀也事有切

而未能忘情有深而未能遣故僕射羣公相知非不深也相期非不厚也然義有四海之重而無同方之感分有一面之深而非累葉之契故與夫昇華者其異乎嗟乎積潘楊之遠好同河汾之靈液目置良友相依窮路是月秋也于時夕也他鄉怨而白露寒故人去而青山迴不其悲乎盍各賦詩云爾

秋日餞別序

黯然別之銷魂悲哉秋之爲氣人之情也傷如之何極野蒼茫白露涼風之八月窮途蕭瑟青山白雲之萬里

奏鳴琴則離鷗別鶴驚歧路之悲心來勝地則時雨涼風助他鄉之旅思琴書人物冀北關西去馬歸軒雲間日下楊學士天璞自然地靈無對二十八宿稟太微之一星六十四爻受乾坤之兩卦論其器宇滄海添江漢之波序其文章元圃積烟霞之氣幾神之外猶是卿雲陶鑄之餘尙同嵇阮接光儀於促席直覩明月生天響詞辯於中筵但覺清風滿室悠哉天地含靈有喜愠之容邱也東西悵望積別離之恨烟霞直視蛇龍去而泉石空文酒求朋賢俊散而琴歌斷門生餞別如北海之

郡前高士將歸似東都之門外研精麝墨運思龍章希
存宿昔之資共啟相思之詠

冬日羈游汾陰送韋少府入洛序

游汾勝壤樓船高漢帝之詞卜洛名都城邑辨周公之
跡仰天文而窺日月雖共光華憑地理而考山川卽殊
南北韋少府玉山四照珠胎一色縱橫振鋒穎之才吐
納積江湖之量子雲筆札擁鸞鳳於行間孫楚文詞列
宮商於調下牽絲一命披林野而隨班考績三年指蘭
臺而赴選移征駕背長亭地隔風烟人離歲月寒原冠

蓋旣同斟桂之歡歧路風塵卽斷驚蓬之思下官詩書
拓落羽翮摧頽朝廷無立錐之處邱園有括囊之所山
中事業暫到漁樵天下棲遲少留城闕忽逢萍水對雲
雨以無聊倍切窮途撫形骸而何託于時冰霜裂地星
象迴天朔風動而關塞寒明月下而樓臺曙各題一字
傳之兩鄉云爾

餞字文明府序

昔者王烈登山林泉動色嵇康入座左右生光豈非仙
表足以感神真姿可以錯物况我巨山之稟孤出昇華

之麗清峙羣公之好善下官之惡俗接覓裳於勝席陪
鶴轡於中軒俱拔出塵之標各仗專門之氣烟霞用足
江海情多言泉共秋水同流詞峰與夏雲爭長雖揚庭
載酒方趨好事之游而肆樂含毫請命昇僊之筆同抽
藻思共寫離懷

感興奉送王少府序

八十有遇共太公晚宦未遲七歲神童與顏回蚤死何
益僕一代丈夫四海男子衫襟緩帶擬貯鳴琴衣袖闊
裁用安書卷貧窮無有種富貴不選人高樹易來風幽

松難見日羽翼未備獨居草澤之間翅翮若齊卽在雲
霄之上鳥眾多而無辨鳳馬羣雜而不分龍荆山看削
足之夫湘水聞離騷之客人貧材富罔窺卿相之門貌
弱骨堅豈入王侯之宅王少府北辭伊闕南登酒山過
我貧居飲我清酒一談經史亞比孔先生再讀詞章何
如曹子建山岳藏其跡川澤隱其形一旦覩風雲千年
想光景孔夫子何須頻刪其詩書焉知來者不如今鄭
康成何須浪注其經史豈覺今之不如古王少府乃可
畏後生學問人也各爲四韻共寫別懷

別盧主簿序

林慮主簿清靈士也達于藝明乎道詮柱下之理駁河
上之義撮其綱統成其卷軸吾儕服其精博時議稱其
典要可謂賢人師古老氏不死矣夫靈芝既秀蘭蕙同
薰仙鳳于飛鵙鸞舞翼何則物類之相感也況乎同得
此義目擊道存此僕所以望風投欵披襟請益展轉於
寤寐殷勤於左右詩不云乎中心藏之何日忘之然變
動之不居乃聚散之恒理琴樽暫離山川有別惟高明
之捧檄屬吾人之解帶王事靡盬良時易失盍陳雅志
各叙幽懷人賦一言同疏四韻云爾

送李十五序

此序又見駱丞
集餞李八騎曹

夫人生百齡促膝是忘言之契丈夫四海交頤非贈別
之資然乃想山川之遽遙送歸將遠惜歲華之不待行
樂無時於是輟征驂以少留做幽亭之多暇山芳襲吹
坐疑蘭室之中水樹含香宛似楓江之上加以御溝新
溜近入離絃賓館餘花遙催別酒既而榮波東注灞岸
南登浮蟻傾而高宴終金馬一作絡而離言促雖
跋烏落相思有贈終結想於華滋而素賞無睽盍申情於麗藻

人爲四韻各賦一言

送白七序

天地所以間南北山川所以別風雲陽舒陰慘覺造化之爲勞日運星迴恨良辰之不定白七官天台傑氣地乳奇精當益友之龍頭處通侯之燕領靈珠耀掌是琴酒之文人長劍橫腰卽風雲之烈士屬天象掩峻帝道微奇吐詞場之珠玉作朝廷之鸞鳳寰中握手得希代之英靈天下傾心盡當年之意氣整秋駕駐春裝背橫溪之七曲對長亭之十里中情易感下調多愁送君當

東陸之前逢我在北風之別嗟乎良友不追神交已遠同人者少方見阮籍之眼青知我者稀不學馮唐之首白唯當遜游絕壑旅思空山幽桂一叢賞古人之明月長松百尺對君子之清風旣而花鳥爭飛烟霞競集青山高而望遠白雲深而路遙貴余以道誰能著後五千言贈子以言空有離前四十韻

送劼赴太學序

今之游太學者多矣咸一切欲速百端進取故夫膚受末學者因利乘便經明行修者華存實爽至於振骨鯁

立風標服賢聖之言懷遠大之舉蓋有之矣未之見也
 可以深慕哉且吾家以儒輔仁述作存者八代矣未有
 不久於其道而求苟出者也故能立經陳訓刪書定禮
 揚魁梧之風樹清白之業使吾徒子孫有所取也大雅
 不云無念爾祖易不云幹父之蠱書不云惟孝友于詩
 不云不如友生四者備矣加之執德宏信道篤心則口
 誦廢食忘寢渙然有所成望然有所伏然後可以託教
 義編人倫彰風聲議出處若意不感慨行不卓絕輕進
 苟動見利忘義雖上一階履半級何足恃哉終見棄於

高人但自溺於下流矣吾被服家業霑濡庭訓切磋琢
 磨戰兢惕厲者二十餘載矣幸以薄技獲蠲戎役嘗恥
 道未成而受祿恨不得如古君子四十強仕也而房族
 多孤飢粥不繼逼父兄之命覩飢寒之切解巾捧檄扶
 老攜幼今既至於斯矣不蠶而衣不耕而食吾何德以
 當哉至於竭小人之心申猶子之道飲食衣服晨昏左
 右庶幾乎令汝無反顧憂也行矣自愛游必有方離別
 咫尺未足耿耿嗟乎不有居者誰展色養之心不有行
 者孰就揚名之業籩豆有踐菽水盡心盍各賦詩叙離

道意云雨

道意云雨
番禺沈葆和初校
南海廖廷相覆校

王子安集卷八

表

上九成宮頌表

臣勃言臣聞帝機無朕道洽則時雖靈化不言功成則
頌顯伏惟陛下體元纂極模神建隧棟梁三氣庭階六
合松軒夜警杳冥姑射之心茅殿晨凝寥廓峒山之駕
臣霑風太上庇影華胥仰衢室而無階候襄城而有地
雖望卑平叔空勤景福之詞而文謝子雲願竭甘泉之
思謹憑天造輒貢九成宮頌二十四章攀紫墀而絕望

叫丹闕而累息臣誠惶誠恐死罪死罪謹言

上拜南郊頌表

臣伏見總章元年十二月四日詔既清東寇將覲南岳甫資元勳旋窺大典伏惟皇帝陛下黼藻神器銜策睿圖用天老之前機戮防風之後至爲而不恃懸寶位於中宸卑以自居託靈符於上帝禮凝蒼璧瑞溢元圭紫旻降祐黃祇叶矩微臣學不照古才不曠時窺宇宙之神功覩郊禋之盛節時非苟遇懷雅頌而知歸道不虛行想謳歌而有志豈與夫周傳考室裁稱棟宇之規漢奏甘泉未息嬉遊之諷比興衰於列代較馳驟於同衢而已謹憑天則輒貢拜南郊頌十章文不足竒意有遺美臣誠惶誠恐謹言

爲原州趙長史請爲亡父度人表

臣某言臣聞奉忠履義帝業所資昭德報功王風是切臣亡父故臣使持節都督豐州諸軍事豐州刺史上柱國南康郡王士達往因隋季預奉皇初于時九洛未清雙嶠尙梗江淮海岳王公數千亡父身羈僞鄭龐極戎庭掃千載之風雲擁三河之士馬情思奉順義不圖生

綿越寇場密歸誠款登太行而耀甲則建德離心出函
谷而揚麾則王充破膽天書屢降手勅仍存泊乎九服
又安四方無事謀臣出鎮猛將臨邊西窮赤水之源東
究青邱之境橫戈北塞盡沙漠之風塵授鉞南荒被牂
牁之矢石義形夷險迹遍疆場分闔淹榮懸車遂禮雖
死於牖下實懷天子之恩力盡方隅無媿忠臣之節今
者歸藏有日先遠戒期陛下德被遊魂惠流枯骨高班
厚祿已極於生前列鼓鳴簫復光於身後誠非毀滅所
能投報但臣霜露之感瞻彼岸而神銷烏鳥之誠俯寒
泉而思咽希開淨福庶補窮埏伏惟陛下恢不次之恩
錄無涯之請使獲從朝例賜許度人濟沈識於昏塗拯
亡靈於燬宅則陛下乾坤之施既不隔於幽明微臣蟻
蟻之心豈忘情於家國是所圖也非敢望也輕贖冕旒
若墜冰谷

啟

上從舅侍郎啟

勃啟一昨弟勛至奉命以憲臺詩十首垂示氣橫霜署
彩洞雲肩繡衣兼藻肆之華白簡控元機之奧仙驄在

馭踐文路而驅神冠獬下臨望詞林而直指勃質惟茅
艾名隔縉紳虛霑自出之榮每愧諸甥之列恩華曲被
誨誘傍臨識謝知音榮深覩奧虞韶忽奏聽律呂而忘
疲楚匣遙開仰光芒而不暇昔孔融之逢元禮罕覩高
文王粲之謁伯喈終慚懿戚援今企古議德疇恩荷慄
兼儲悲欣兩集但才非酷似攀宅相而冬慚慕切如存
臨涓陽而增感不勝荷戴屏營之至

上武侍極啟

勃啟勃聞元螭掩耀光銷赤堇之芒白鶴摧輝影滅青
胡之寶繇是紫霄氣耿指牛漢而忘歸丹水神迷蹈驪
泉而罔悔其有龍文已遠輕圖剗兕之功魚目濫持自
擬靈虵之色循榮覽分朝聞夕可君侯締華椒閣席寵
芝局粲貂冕於金軒藻龜章於玉署月開鸞鏡懷精鑑
以分形霜湛虬鐘蘊希聲而待物吞九溟於筆海若控
牛涔抗五岳於詞峯如臨蟻垤馳魂霧谷所逢紫岫之
英驛思霞邱佇接青田之響勃北巖曲藝東臬下節攀
翰苑而思齊係文風而立至迹疲千里未陪丹轂之遊
葉契三英尚隔黃衣之夢謹憑洪貸輒錄舊文輕敢上

呈列之如右涓波有託望日谷以馳誠鐘鼓無施伏雷
門而假息謹啟

又

勃啟一昨不緣媒紹輕承盼飾祇寵相驚俯仰無地何
則循方極弊尙虧風雨之間撫翼濡鱗猶失江湖之上
况乎九天鵬術一代龍門榮枯舛致山川在目而可以
追騰白日忘言於咫尺之書干突青雲投跡於尋常之
境徒以北林增秀弱翰知歸東壑流謙纖鱗未已神交
道合君侯昭疋善之榮千載一時下走得長鳴之所是

用謬憑高獎曲撰蕪音游海無際過雷自警雖黃金激
憤指秦路而方窮蒼壁慚恩伏焦原而未遠謹啟

上李常伯啟

勃啟勃聞杞林騰秀羽族知歸賜谷流謙波臣有託然
則朝光八聖尙欣牧豎之詞道濟五殘未隔輿人之詞
謹憑斯義輒呈宸遊東岳頌一首當仁不讓下走無慚
於自媒聞善若驚明公豈難於知我龍門高遠眇黃道
而無階爵里既投叫丹闈而有地伏願暫停左右曲流
國士之恩廣進芻蕘俯息樵夫之議輕陳徑捷退用彷彿

得

上皇甫常伯啟

勃啟一昨奉命令寫新對臺策及前後舊文謹憑國士之恩敢進輿人之頌竊以龍鑣就路駑駿相懸鵲鏡臨春妍媸自遠亦有飛霜匝地蘭蕭銜共盡之悲烈火埋岡玉石抱俱焚之慘然則知音罕嗣流水空存至寶不同荆山有淚君侯飾揚芻議提獎蕪詞白圭成再見之榮黃金定一言之重鵬翮既接仰雲逕而將趨龍阪可登指星臺而有望循襟佩德撫事知恩山岳有輕河漢

無極謹啟

又

勃啟自恭陳薄技祇奉話言咳唾成恩盼睽爲飾征夫擊節方思孤竹之風壯士寒心實有長楊之作謹憑嚴命輕呈乾元殿頌一首將冀導江至海常以筆札見知南館西園遂與簪纓爲伍德雖無盡攀驥尾而方遙生也有涯比鴻毛而非重謹啟

上吏部裴侍郎啟

勃啟猥承衡鏡驟照堦墀本慚刀筆之工虛荷雕龍之

睠殊恩屢及嚴命頻加賁光耀於昏冥課宮商於寂寞
進退維谷憂喜聚門誠恐下官冒輕進之譏使君侯招
過聽之議貴賤交失恩愛兩虧所以戰懼盈旬遲迴改
朔懷鄭璞而增愧捧燕珉而自恥勃性惟懵昧識謝沈
冥蒙父兄訓導之恩藉朋友琢磨之義好學近乎智力
行近乎仁知忠孝爲九德之源故造次必於是審名利
爲五常之賊故顛沛而思遠雖未之逮也亦有其志焉
孔子曰言及之而不言謂之隱今者接君侯者三矣承
招延者再矣抑亦可以言乎夫文章之道自古稱難聖

人以開物成務君子以立言見志遺雅背訓孟子不爲
勸百諷一楊雄所恥苟非可以甄明大義矯正末流俗
化資以興衰家國繇其輕重古人未嘗留心也自微言
旣絕斯文不振屈宋導澆源於前校馬張淫風於後談
人主者以宮室苑囿爲雄叙名流者以沈酗驕奢爲達
故魏文用之而中國衰宋武貴之而江東亂雖沈謝爭
驚適先兆齊梁之危徐庾並馳不能免周陳之禍於是
識其道者卷舌而不言明其弊者拂衣而徑逝潛夫昌
言之論作之而有逆於時周公孔氏之教存之而不行

於代天下之文靡不壞矣。國家應千載之期，恢百王之業，天地靜默，陰陽順序，方欲激揚正道，大庇生人，黜非聖之書，除不稽之論，牧童頓顙，思進皇謀，樵夫拭目，願談王道，崇大厦者，非一木之材，匡弊俗者，非一日之衛。眾持則力盡，真長則偽消，自然之數也。君侯受朝廷之寄，掌銛範之權，至於舞詠澆淳，好尚邪正，宜深以爲念也。伏見銓擢之次，每以詩賦爲先，誠恐君侯器人於翰墨之間，求材於簡牘之際，果未足以採取英秀，斟酌高賢者也。徒使駿骨長朽，真龍不降，銜才飾智者，奔馳於末流，懷真蘊璞者，栖遑於下。列易不云乎：言行君子之所以動天地，失之毫釐，差以千里。書不云乎：敝化奢麗，萬世同流，餘風未殄。公其念哉！嗟乎！蓋有識天人之幽，致明國家之大體，辨焉而不窮，酌焉而不竭，抱膝無悶，盱衡自得，彼悠悠小技焉，足爲君侯道矣。自非奉閒宴，接清談，未可一二言也。然竊不自揆，嘗著文章，非敢自媒，聊以恭命，謹錄古君臣讚十篇，並序，雖不足塵高識之門，亦可以見小人之志也。伏願暫停左右，少察胸襟，觀述作之所存，知用心之有地，謹啟。

上明員外啟

勃啟側聞金烏聳轡俯圓燧而抽光瑤兔浮輪候方諸
 而吐液斯則洪纖異數冥符造化之津高下相懸精契
 陶鈞之表故知聲同義合存長幼於三州理隔氣殊置
 山川於一面神交可托風雲於杵臼之間道不虛行涇
 渭於簪裾之列其有跡申知已投爵里於思齊事迫當
 仁抱龍泉而願割雖荆山已峻多輕抵鵲之珍而渤海
 方春敢進歸鳧之影伏惟丈人珠躡降德銑社抽英河
 岳縱其神器烟霞發其符采江東第一家傳正始之音

日下無雙譽重名流之首三冬文史先兆跡於青衿百
 里弦歌即馳芳於墨綬彭澤陶潛之菊勝氣仍存河陽
 潘岳之花芳風遂遠榮加從袂上膺一作清蘭府之遊寵
 奪攀輪更掌蓬山之務麟圖緝諡定榮辱於三泉鶴閣
 裁書考薰猶於四部既鶴鳴雲路望偃朝端鴻漸星臺
 俯諧僉議廉平譽號李宣伯之當官雅操繩時山巨源
 之稱職加以文場武庫發揮廊廟之師瓊樹瑤林寥廓
 風塵之表一邱一壑同阮籍於西山一嘯一歌列嵇康
 於北面詞條鬱霧遙騰駕日月一作月之陰辯鏘橫霜直上

衝星之氣鳧鐘蓄韻聞片言而指掌鸞鏡懸心見一善而明目情源九派士流欣滿腹之期德宇干門詞人有庇身之望方當坐談帝席雄視羣公豈徒比迹天府雌伏郎官而已哉勃崇徽啟緒盛德傳家承太子之仙宗析將軍之遠系朱輪在漢列高士於三台青蓋浮江扈平王於七姓遺風舊烈尙存清白之基祖德家聲代有縱橫之目及金陵東覆玉馬西奔髦碩傑起文儒繼出鳳鳴朝日森梢烟雨之標龍躍雲津盤礴江山之氣雖雄名雅譽隨朔野而揚聲而華冕雕軒比南風而不競

陳太邱之積善羔鴈成羣謝車騎之餘芳蘭蓀不替趨庭洽訓共歌朱萼之篇避席承歡猶守青箱之業嘗謂酣神北阜藉春渚而忘歸動影南櫺坐秋山而長往不意蘭臯獨嘯輕交委鶴之書芝澗行謠坐辱飛龍之使年殊賈誼仰宣室而方同業謝劉繇俯長途而遂忍塞上浮雲之跡空倦吳山隋侯明月之珠終悲暗室豈不知拂衣長謝林泉多倨俗之因安枕有餘廟堂非養高之所松楸坐月臨黛壑而遐征桂席攀風俯青巖而自足而欲俛首屈膝逡巡多士之林弔影慚魂骯髒文昌

之府徒以牛蹄已倦臨大壑而驤鱗羊角可逢想高衢
而撫翼參名國土方叨智伯之恩揮迹奉常冀雪公孫
之恥識正平於處士雖在孔融期仲容於望外終資許
允猶恐先馳折翮頻驚鵬路之風再舉枯鱗空擊龍門
之水丈人借以顏色資以恩波垂雅契於長年叙情交
於累代情加倒屣知頃步之生光禮極升堂覺聲名之
有地是用俯抽丹思上瀆清顏鏤殊獎於肝膽銜德音
於咳唾懦夫增氣先歌易水之風壯士投心思赴吳宮
之火恩崇命淺瞻呂梁而可泛山高海深陟孟門而何

險謹啟

上許左丞啟

勃啟自違阻恩華髮纏風恙守愚空谷斂迹仙臺同衛
玠之虛羸談非正始愧劉楨之逸氣卧似漳濱朝野旣
殊風猷遂隔望芝蘭之漸遠覺鄙恡之都生所以暫下
松邱言游洛邑永懷前睠逡巡元禮之門延首下風匍
匐文章之府實願稍捐人事少奉清言質儒釋之幽疑
訪空元之極境願聞者道敢披江海之心祈進者榮非
慕軒裳之重雖齒絕位殊空塵左右而道存自擊豈隔

形骸輕陟階堂伏深悸越謹啟

上郎都督啟

勃啟勃聞古之君子重神交而貴道合者以其得披心胸而盡志義也是以叔牙苟在管仲分多而不貪無知尚存陳平受謗而非罪何則達其趣者能申其迹收其大者能讓其細也今勃東鄙之一書生耳少懷耿亮頗慕高烈俛仰相得則屠博可遊造次不諧則軒冕異路蒙君侯國士之遇受君侯長者之禮繾綣談謔殷勤誨誘今有情而不告是不盡也有窘而不託是有疑也將恐季布無侶於後葉孫臏獨稱於前古嗟乎可以竭誠矣敢不盡言乎勃家大人天下獨行者也性惡儲斂家無擔石自延國譴遠宰邊隅嘗願全雅志於暮齒揚素風於下邑而道里夙遙資糧窘鮮秩寡鍾釜債盈數萬此勃所以側目扼腕臨深履薄庶逢知己之厚以成大人之峻節也古人有言富觀其所與貧觀其所取又曰損有餘補不足於君侯何如哉然則定其交而後求敢無愧已易其心而後語夫何飾焉賑給之義旣惟其常厚薄之差伏希俯訪輕塵視聽倍增兢惕

[Faint bleed-through text from the reverse side of the page]

番禺沈葆和初校

王子安集卷八

南海廖廷相覆校

王子安集卷九

書

上劉右丞書

蓋聞聖人以四海為家英宰與千齡合契用能不行而
至春霆仗天地之威以息相吹時雨鬱山川之兆故有
元蛟晚集憑鶴鼎而先鳴蒼兕晨驚運龍韜而首出並
能風騰霧躍指麾成烈士之志蠖屈虬奔談笑坐羣卿
之右未如一作知越蒼海棄行間排紫微謁天子於是遭
不諱之主擁非常之位龍章鳳黻照其前鏘金鳴玉疊

其後三靈叶贊超然奉天下之圖四海承平高步取寰中之託君侯之富貴足矣聖朝之付遇深矣故知陽侯息浪長鯨卧橫海之鱗風伯停機大鵬鍛垂天之翼及其投形巨壑觸丹浦而雷奔假勢靈飆指青雲而電擊神氣洋洋謂麟翮使之然也殊不知兩儀超忽動止繫於無垠萬化糾紛舒卷存乎非我是以陳平昔之智士也俯同降卒百里奚曩之達人也親爲餓隸當其背強敵轉康衢雄慮耿於風雲危途迫於朝夕豈自期榮稱相府西藩專虎據之圖寵冠齋壇東向舉熊飛之策顧盼可以蕩山岳咄嗟可以降雷雨遂令用與不用是非于楚漢之間知與不知得失于虞秦之際故死生有數審窮達者繫于天材運相符決行藏者定于已君侯足下可不謂然乎借如勃者眇小之一書生耳曾無擊鐘鼎食之榮非有南隘北閣之援山野悖其心迹烟霧養其神爽未嘗降身摧氣逡巡于列相之門竊譽于時匍匐于羣公之室所以慷慨于君侯者有氣存乎心耳實以四海兄弟齊遠契于蕭韓千載風雲託神知于管鮑不然則荷裳桂楫拂衣于東海之東菌閣松楹高枕于

北山之北焉復區區屑屑踐名利之門哉至尊以搖河
徙岳之威當立地開天之運聖人有作羣材畢舉星辰
入仕揖讓朱鳥之門風雨稱臣奔走蒼龍之闕方欲停
旒金室引成康于已任闢纘瑤林復堯舜于茲日可謂
明明穆穆盡天子之容貌矣抑嘗聞之丹山九仞烟峰
非數簣之功紫極千門雲臺俟萬楹之力故天下至曠
神器不可獨專天道無私元勳有待而立書曰元首明
哉股肱良哉好問則裕自用則小况掌萬國之權受一
人之寵動見臧否言知利害君侯足下何時易耶雖國

有大命不資童子之言而恭此小心敢進狂夫之說伏
見遼陽未靖大軍頻進有識寒心羣黎破膽昔明王之
制國也自近而及遠先仁而後罰徵實則效存徇名則
功淺是以農疏千里僅踰重石之鄉禹截九州不叙流
沙之境豈才不及而智有遺哉將以辨離方而存正功
也雖至人無外甲兵耀天子之威王事有征金鼓發將
軍之氣而長城在界秦漢所以失全昌巨海橫流天地
所以限殊俗闢土數千里無益神封勤兵十八萬空疲
帝卒驚烽走傳駭秦洛之甿飛芻輓粟竭淮海之費于

是乘奸放命者出繩纏以生威因公挾私者入閭閻而競法雖一物失所泰階延盱食之憂而百戰方雄中國鮮終年之樂園得而不圖失知利而不知害移手足之病成心腹之疾征稅屈于東西威信蹇于表裏語曰勝之不武不勝爲辱天下之責四面至矣誠可遠凝高策上薦忠言決人事于去就合天情于終始遂令回麾轉檄背青邱而鶩列障分亭巡蒼波而守昔者齊侯以力方城爲楚國之辭虞帝崇文苗人失洞庭之險況乎仗德綏亂以直乘邪明逆順之端聳華夷之望雖復舳艫

沸海旌旗觸天鐵山四面金城千里亦不能爲敵人計矣此君侯之未論一也蓋聞星迴日運御洪荒者貞夫一電照風行制寥廓者歸乎靜易曰復其見天地之心乎語曰動之斯和綏之斯來是知源潔則流清形端則影直大道起而仁義息神化周而市獄定雖復體元立教眚災耀知遠之書順時宰物宥罪發精微之典而况澆風易漸淳化難歸孔明耿介于當朝子輿殷勤于易簣蓋有繇也伏見邊凶尙梗殊恩屢發亡命山澤者日月相趨朝脫桎梏夕還囹圄姦徒抱袂因時立僥倖之

謀頑夫頓足中路紆吁嗟之慘皆繇寬勝于猛人迷所
習勸沮不彰廉耻相冒亦有公卿失職耻受珪符之任
郎官有釁俯捨銅墨之榮又焉可以宏張風流抑揚眾
務者也且夫朽索充羈不收奔馬之逸輕緡振網或隨
吞舟之勢况非常之化方洽于齊人无妄之恩乃及于
羣小將恐匡衡管仲復靈沼一作詔于下泉矣古之善為
國者不然信賞而必罰道德而齊禮澤配雲雨而無曲
惠威匹雷霆而絕私戮交書聳幣仗慈厚之師投金散
璧樹仁明之長故雖開衢室蓋明堂亦將四三皇而六

五帝矣此君侯之未論二也蓋易曰天地之大德曰生
聖人之大寶曰位何以守位曰人何以聚人曰財是知
發揮地利農桑啟其業振蕩天功泉貝流其用伏觀前
制屢擾事非畫一塵市蕭然人情怪動夫煩一作稱簡竝
用未盡交易之審輕重齊行適啟兼并之路于是連闌
掩闔者閉肆而乘其屈布衣韋帶者闔門而受其困五
方競爽務淺術以相雄百郡爭勝驅末技而成弊田夫
織婦衣食鮮終朝之給巨駟洪商輿馬挾封君之勢蓋
有繇來矣故曰國儲闕于九歲則公上無所給家廩乏

于三年則妻子非其有夫陰陽覆逆天地之常數百六
運窮堯湯所不免一旦洪泉決地大旱焦山風雨于一
歲之間霜雹于數州之境繁運廣役首尾于中外沓稅
增徭日夕于都鄙燮陰陽者將何以處之一夫竊議公
之盛德虧矣愚謂嚴程峻法絕輕陋之貨則奸鎔之源
塞矣公風正典重耕耘之務則邪贏之計沮矣然後遠
宏教旨大變流俗法立有犯而必施令出唯行而不返
違公竊鑄者具五刑之戮因時力田者懸一命之賞不
然則賈生晁錯復流涕而言矣此君侯之未論三也嵩
衡不拒細壤故能崇其峻江海不讓纖流所以存其廣
是以星臺曉闕上台忘吐握之勞月殿宵興中宇軫山
林之慕知夫御天下者必待人也詩曰濟濟多士文王
以寧未見君子憂心如醉伏見皇明遠燭帝采遐宣張
樂岱郊騰勳社首徵廉察孝瑤壇虛不次之階署行議
年璿檢動非常之詔天下可謂幸甚矣于是友月朋霞
之容背青皋而至馮唐顏駟之才排紫閣而集夫豈知
終始異數涇渭同流蘿薜失圖簪纓解體惜哉羣英霧
散名侯招蔽善之嫌天下雷同君子鮮長鳴之地而欲

招絕足致真龍難矣此君侯之未諭四也易曰拔茅連茹以其彙征吉豈非順物不若招類報國不如進賢陽事昇而雨露歸陰駕凝而風霜厲莫不觀時有記撫氣相求窮則獨善其私達則兼善天下而利已疵物者以自任爲身謀知進忘退者謂專榮而得計豈知夫尺波易謝寸晷難留陵谷好遷乾坤忌滿君侯足下出納王命升降天衢激揚鳳辰之前趨步靈臺之上亦復知天下有遺俊乎夫心之精微口不能言也言之微妙書不能文也伏願闕東閣開北堂待之以上賓期之以國士使得披肝膽布腹心大論古今之利害高談帝王之綱紀然後鷹揚豹變出蓬戶而拜青墀附景搏風捨臺衣而見絳闕幸甚斯不爲難矣庶幾乎麇卵不棄終感元枵之精駿骨時收或致飛黃之錫書生王勃死罪死罪再拜

上絳州上官司馬書

月日龍門百姓王勃再拜奉書于司馬上官公足下蓋聞靈化出于窈冥帝圖寄于寥廓聖人生而萬物睹太階平而四國會故曰有非常之后者必有非常之臣有

非常之臣者必有非常之績至今雷奔雨嘯風旋電轉
拾青紫于俯仰取公卿于朝夕雲臺迫漢南宮列元宰
之圖霜戟羅門北闕據名臣之第嘗見之矣至若時非
我與雄畧頓于窮途道不吾行高材屈于卑勢孔宣父
之英達位未列于陪臣管公明之傑秀各僅終于郡屬
有時無主賈生獻流涕之書有志無時孟子養浩然之
氣則亦有焉豈非妙造無端盛衰止乎其域神明有待
動靜牽乎所遇向使太公失于周伯則旗亭之屠父韓
信屈于蕭何則轅門之餓隸又焉得鷹揚豹變吐納風

雲者哉故曰知與不知用與不用觀夫得失之際亦窮
達之有數乎其有邀時譽忘廉耻徇苟得設向背于朝
廷立縱橫于勢利舉三寸之舌屈辱豪門奉咫尺之書
逡巡下席皆自謂材足以動俗智足以濟時鐘鼎輝其
顧盼冠蓋生其藉甚豈知夫四海君子攘袂而耻之乎
五尺微童所以固窮而不爲也此蓋莊周有言所以得
意而忘象得象而忘言語曰談何容易易稱書不盡言
如談之不易而欲言之盡以是思之良可知矣下官者
康衢之賤耳嘗聞闕里之言頗掛平輿之目豈不知塵

形俗狀游水鏡而多慚抱鼓援輦過雷門而自失而欲
刻鵠飾鳧唐突扁鑰者邪徒以登山泛海庶測高深執
炬傳螢希增日月三奔九合下官聞管仲之風千載一
時君侯受鮑卿之託是以敢陳其逕庭不然則秋風明
月西江留獨往之因桂嶠松巖南山有不羣之地矧區
區者而重高明之闔闔哉君侯極天分構振瓊樹而韜
霞帶地疏源握珠胎而冠月鱗軒羽殿瑤臺降卿相之
榮鵠印蟬簪金社發公侯之始青臯獨唳望鴻漸而翻
霞丹穴高鳴對鵠池而矯霧巖叻以賢良待詔未厭承

明汲黯以方正拾遺終榮卧理藩維克振旣參來暮之
歌邦國不空自有康沂之相加以雄材廣度散琬琰于
曾懷逸氣道文運風霜于掌握追青霄而構舍烟霞之
涯涘莫尋振滄渤以流謙江漢之波瀾未測耀靈珪于
趙席垂棘知歸辨羣籟于莊軒懸匏自託賓階夕敞清
河銷驥贄之虞虛榻晨披元禮得龍驅之地方當翊贊
宸極羽儀台屏豈徒偃仰州縣勞事藩庭而已哉借如
僕者言不滿于鄉黨聲不出于堂闕東海取樂于簞瓢
南山畢志于文史餐花佩葉入蘭室而談元挹露攀霞

坐松扃而嘯逸揚子雲之澹泊心竊慕之嵇叔夜之逍
遙真其好也未嘗露才揚已飾小智以驚愚假勢憑時
託中人而樹迹遍遊天下寒心于將相之門獨守太元
側身于名利之境嘗謂奉琴卮于北牖詠詩禮于南陔
坐商洛而折雲英臨江湖而採烟液生願畢矣而屬鸞
扇停逸頻虛不次之階鶴板徵賢累發非常之詔天下
有道吾豈匏瓜承達人一顧之榮辱公車再辟之禮平
津侯之博物終屈奉常賈大夫之才名猶逢絳灌況庸
者而可免于此乎君侯要津先據圖海盛于當時下官

覆篋方勤爲山始于今日雖陵深谷變終非入室之賓
而畫咏宵吟敢預升堂之列夫以幽明不測尺標見天
下之心巨細相傾寸管合羲舒之度豈非道存斯貴理
在必亨霸畧近發于輿歌皇圖不隔于芻議故有榮枯
絕等奉推轂而欣然年勢不侔受分庭而罔愧風規可
接惟君侯體之今古未殊則下官願矣常恨霜松列澗
萬尋無罩月之期露草滋山寸莖有梢雲之望斯則聲
實困于兼濟才位難于俱立况乎地勢不足以誇俗容
貌不足以動人遑遑藪澤安足以奉高明之咳唾也所

冀蠅階賤質附雲足而追颯蚋序輕姿託霜毛而絕海
委名勵已蛟鐔申獨斷之能偶迹當仁驪珠鮮闇投之
懼天衢可望指鵬程而三休巨壑難遊伏龍門而一息
勃死罪死罪

爲人與蜀城父老書

蓋聞天地作極不能遷否泰之期川岳薦靈不能改窮
通之數豈非聖賢同業存乎我者所謂才榮辱異流牽
乎彼者所謂命是以龍驤鳳翥伊周成翊贊之功含糗
羹藜顏冉困棲遲之病或先號而後笑或始言而終凶

事不可量功未必定則知洪濤未接長鯨多陸死之憂
層風未翔大鵬有雲傾之勢池鱗并鮒亦將鼓鱗而輕
之田鳩野鷄亦將騫翮而侮之及其衝溟渤接扶搖吹
波則江漢倒流騰氣則虹霓掩彩摩赤岸負蒼天然後
知其力焉吁韓信之無津也昌亭之一餓夫耳馬卿之
失路也臨邛之一食客耳武不足以服眾文不足以動
時長劍屈于無知洪筮淪于不用洎乎雄圖躡運至尊
納背水之謀麗藻昇朝天子賞凌雲之作威加海岳聲
振廊廟彼淮陰之俠少成都之遺老也又焉能知遠近

哉是以鑑物于肇不于成賞士于窮不于達是知卞和
之得玉也精存于岸谷之間張華之得劍也氣發于星
辰之際夫豈琢磨成器然後知其寶剗斲爲能然後知
其用哉仰惟鄉耆等並玉山高族金堤勝侶列子弟于
千城耀衣冠于百代或以風雲去國公孫躍馬之年鐘
鼎從王諸葛攀龍之日門庭相接雕甍將綺棟連陳機
杼相和鳳鏞將虬梭交響金漿玉饌食客三千綠幘青
裳家僮數百冲襟渺識人多江漢之靈麗藻華文代有
雲淵之氣北齋開敞南館虛閒詩酒同歸琴書合契忘

機得意耻嵇阮之交疎虛席延賓恨原嘗之容少實烟
霞之藪澤風月之津梁者乎劉仲文之遠識不以乾沒
詣梁城閔仲叔之高風不以口腹累安邑雖其已沒生
氣猶存况乎屬宇宙之明當天下之泰不能俯拾青紫
高視縉紳攀北極而謁帝王入南宮而取卿相脅肩側
足求哀鐘釜之間低首俛眉取濟升斗之未嗟乎誠下
官所以仰天漢而鬱拂臨江山而慷慨者也但時可以
未遇道可以未行志願可以未成功業可以未就古之
才足以輔王業躡迹屠釣之間功可以濟巨川藏身版

築之下百里奚之負販陳湯之丐貸而况于庸者哉此
僕所以駿奔于顧盼之餘自致于恩光之末也且夫精
誠所感尚動神明意氣相交豈慚車馬倘能投心季子
遙存素紉之恩援手應侯先立綈袍之贈豈人之情也
能無報乎方今白藏紹序朱律謝期天高而林野疎候
肅而江山靜輕蟬送夏驚晚吹于風園旅鴈乘秋動宵
吟於露渚絲纈成于南畝秔黍被于東阡時計有儲願
履多福下官薄游綿載飄寓淹時歡躋相仍憂虞自積
陟梁鴻之峻岳何暇長謠臨阮籍之窮途唯知慟哭庶
憑調給以濟飄危輕訴短懷佇流嘉耗

又

蜀都廣鎮岷嶮奧壤山分玉宇水向金陵景貺有期英
靈間出榮問休暢幸甚幸甚夫神有可迫淥波驚七柱
之音道有可符元霜扣九鐘之節豈道窮精祕妙聽察
于無聲理實杳冥示應通于不測波流柱響波無入柱
之因霜落鐘鳴霜非扣鐘之具况乎言忘意得臭味相
求日擊道存神明已接鄭僑之逢吳札無謂殊方阮籍
之對嵇康自然同氣僕雖不敏嘗從事于斯矣嘗謂薰

猶不共器臯鸞不比翼是以類乎方者接風雲于千里
乖乎類者起山川于一面抑嘗聞之士之生也其迹可
擯而道不可藏其身可辱而志不可奪其有拂衣投臂
遯形滄海之隅裂裳裹足獨立高山之頂量腹而食度
身而衣以鐘鼎爲芻豢以衣冠爲縲紲方欲策鸞鳳而
撫雲英鞭虹霓而採烟液其次排玉闕指金門成賈誼
之謨樹終軍之策因機入務懷素將相之門沐露沾霜
擁篲公侯之室然則拾青紫于旦暮取功名于俄頃演
文物而動寰中騰聲名而振天下若下官者可謂慚二
途矣而斂手長揖強顏高視低心于蹇躓之辰忍耻于
恓惶之日者哉渭濱留釣鷹揚之業未萌淄源滯牧鴻
漸之資蓋寡及其攀穹運接靈期乘雲雷而清八極和
陰陽而調萬品則知冥機所運吉凶于倏忽之間元命
所移飛伏于斯須之際日月自至聊復爾爾方今炎飈
謝節爽候開辰風高而宇宙清霜下而亭郊肅歸雲止
鴈流曙響于東津落照開鴻寫晴規于此岸螢疎夕砌
蟬促朝林感序緣情登高寄賞僕一違秦隴再革炎涼
戒征軸而無因指歸途而有倦故鄉超曠層山重複吳

宮尚遠頻驚去燕之心楚峽猶賒已下聞猿之淚徒以
風猷未隔道義相存幸承知己之心稍緩他鄉之思昔
虞公再見懸光白璧之前季布一言猶定黃金之諾況
乎交已成于杵臼道已茂于金蘭希照窮途遠流嘉貺
若使恩裁口腹空留安邑之賓惠闕始終取恨昌亭之
客

與契苾將軍書

昊天不忱哲人終否舉公逝矣傷如之何敬想情則懿
親義惟良執非夫人之爲慟其誰爲慟乎僕與此公早
投交契夷險之際終始如一常思並建忠孝之績共申
家國之讐壯志不就古人所悲何圖一旦長訣嗚呼哀
哉管仲不存叔牙空在子皮已喪子產何依興言追昔
良增痛悼適得韋四郎書具承大郎雅意知欲以此公
碑誌託之下走夫撫今懷昔理寄斯文旌德叙功事屬
知已是以子期幽思感叔夜之形言伯喈雄藻待林宗
而無愧下走雖不敏幸託深期此而不爲誰當爲者但
恐位卑先達才非拔萃虛承厚睠不副高聞謹遣舍弟
勛往面取進止臨書啜泣慘惶不次

上百里昌言書疏一作

三
劬氏刊

勃言奉五月一日誨子弟各陳百里之術宣于政者承命惶灼伏增悲悚勃聞古人有言明君不能畜無用之臣慈父不能愛無用之子何則以其無益于國而累于家也嗚呼如勃尚何言哉辱親可謂深矣誠宜灰身粉骨以謝君父復何面目以談天下之事哉所以遲迴忍耻而已者徒以虛死不如立節苟殞不如成名悔過儻存于己爲仁不假于物是以孟明不屑三奔之請而罷匡秦之心馮異不羞一敗之失而摧輔漢之器故其志卒行也其功卒就也此言雖小可以喻大此勃所以懷旣往而不咎指將來而駿奔割萬恨于生涯進一簣于平地者今大人上延國譴遠宰邊邑出三江而浮五湖越東甌而度南海嗟乎此皆勃之罪也無所逃于天地之間矣然勃嘗聞之大易曰人之所助者信也天之所助者順也是以君子不以否屈而易方故否而終泰忠臣不以困窮而喪志故困而必亨今交趾雖遠還珠者嘗用之矣書不云乎弗慮胡獲弗爲胡成不勝憤激之至謹上百里昌言一部列爲十八篇分爲上下卷庶竭

私款少裨公政追思罪戾若投冰谷謹奉言疏不備勃
再拜

番禺沈葆和初校

南海廖廷相覆校

王子安集卷九

王子安集卷十

論

三國論

論曰漢自順桓之間國統屢絕奸回竊位闔宦滿朝士
之蹈忠義履冰霜者居顯列則陷犯忤之誅伏閭巷則
嬰黨錮之戮當是時也天下之君子掃地將盡雖九伊
周十稷契不能振已絕之綱舉土崩之勢明矣熹平中
大黃星見楚宋之分遼東殷馗曰其有真人起於譙沛
之間以知曹孟德不爲人下事之明驗也先時秦帝東

遊亦云金陵當有王者興董扶求出又曰益州有天子
氣從茲而言則長江劍閣作吳蜀之限天道人謀有三
分之兆其來尚矣然廢興有際崇替迭來每覽其書曷
能不臨卷而永懷撫事而伊鬱也嘗試論之曰向使何
進納公業之言而不追董卓催汜棄文和之策而不報
王允則東京焚如之禍關右亂麻之屍何繇而興哉至
使乘輿蒙塵於河上天子露宿於曹陽百官饑死於牆
壁六宮流離於道路蓋繇何公之不明賈詡之言過也
於是劉岱喬瑁張超孔佃之徒舉義兵而天下響應英

雄者騁其驍悍運其謀能海內囂然於茲大亂矣哀本
初據四州之地南向爭衡劉景升擁十萬之師坐觀成
敗區區公路欲居列郡之尊瑣瑣伯珪謂保易京之業
瓚既窘斃術亦憂終譚尚離心琮琦失守其故何哉有
大賢而不能用覩長策而不能施便謂力濟九區智周
萬物天下可指麾而定宇宙可大呼而致也嗚呼悲夫
余觀三國之君咸能推誠樂士忍垢藏疾從善如不及
聞諫如轉規其割裂山河鼎足而王宜哉孫仲謀承父
兄之餘事委瑜肅之良圖泣周秦之痕請呂蒙之命惜

休穆之才不加其罪賢子布之諫而造其門用能南開
交趾驅五嶺之卒東界海隅兼百越之衆地方五千里
帶甲數十萬若令登不早卒休以永年神器不移於暴
酷則彭蠡衡陽未可圖也以先主之寬仁得衆張飛關
羽萬人之敵諸葛孔明管樂之儔左提右挈以取天下
庶幾有濟矣然而喪師失律敗不旋踵奔波謙瓚之鬪
羈旅袁曹之手豈拙於用武將遇非常敵乎初備之南
也樊鄧之士其從如雲比到當陽衆十萬餘操以五千
之卒及長坂縱兵大擊廓然霧散說身奔走方欲遠竄
用魯肅之謀然投身夏口于時諸葛適在軍中向令帷
幄有謀軍容宿練包左車之計運田單之奇操懸軍數
千夜行三百輜重不相繼聲援不相聞可不一戰而擒
也坐以十萬之衆而無一矢之備何異驅犬羊之羣餌
豺虎之口固知應變將畧非武侯所長斯言近矣周瑜
方嚴兵取蜀會物故於巴邱若其人尚存恐玉壘銅梁
非劉氏有也然備數困敗而意不折終能大啓西土者
其惟雅度最優乎武侯歿劉禪舉而棄之觀譙周之懦
詞甘忿憤而忘食聞姜維之立事又慷慨而言喜惜其

功垂成而智不濟豈伊時喪抑亦人亡乃知德之不修
棧道靈關不足恃也魏武用兵髣髴孫吳臨敵制奇鮮
有喪敗故能東擒狡布北走強袁破黃巾於壽張斬眭
固於射犬援戈北指蹋頓懸顛擁旆南臨劉琮束手振
威烈而清中夏挾天子以令諸侯信超然之雄傑矣而
弊於褊刻失於猜詐孔融荀彧終罹其災孝先季珪卒
不能免愚知操之不懷柔巴蜀砥定東南必然之理也
文帝富於春秋光膺禪讓臨朝恭儉博覽墳籍文質彬
彬庶幾君子者矣不能恢崇萬代之業利建七百之基
骨肉齊於匹夫衡樞委乎他姓遠求珠翠廢禮諒闇之
中近抱辛毗取笑婦人之口明帝嗣位繼以奢淫征夫
困於兵革人力殫於臺榭高貴鄉公明決有餘而深沈
不足其雄才大畧經緯遠圖求之數君並無取焉山陽
公之墳土未乾陳留王之賓館已啓天之報施何其速
哉故粗而論之式備勸戒俾夫來者有以監諸焉

八卦卜大演論

昔者聖人之作易者始畫八卦以通神明之德以類萬
物之情以爲分太極者兩儀也分四象者八卦也成八

卦者十六將也司八卦者十二月也分十六將者三十
二候也分十二月者二十四氣也分三十二候者六十
四卦也司二十四氣者三十六旬也進退於三百六十
六日屈伸於三百八十四爻往來飛伏之理盡矣孤虛
消息之端極矣三才之道不可及也五行之義不能
復過也翕之以幽明張之以寒暑會之以生死申之以
去就禍福生焉吉凶著焉成敗行焉逆順興焉賢者識
其大者遠者不賢者識其小者近者奉之者則順背之
者則憊圓立者稱聖偏據者號賢嘗試論之曰三才者
易之門戶也八卦者易之徑路也引而伸之終於六十
四卦天下之能事畢矣陳而別之極於三百八十四爻
天下之微理罄矣夫陰陽之道一向一背天地之理一
升一降故明暗相隨寒暑相因剛柔相形高下相傾動
靜相乘出入相藉混之者神也形之者道也可以一理
徵也可以一端驗也故天尊則地卑矣水溼則火燥矣
山盈則澤虛矣雷動則風適矣是以天下有風可以妬
矣則地中有雷可以復矣天下有山可以遯矣則澤上
有地可以臨矣天地不交可以否矣則天地既交可以

泰矣風行地上可以觀矣則雷行天上可以大壯矣山
附地上可以剝矣則火附天上可以大有矣風行水上
可謂渙矣則水在地上可以比矣雷出地奮可以豫矣
則風行天上可以小畜矣雷之與水可作解矣則風之
與火可以家人矣雷在風上可以恒矣則風在雷上可
以益矣風在地下可以升矣則雷在天下可以无妄矣
風在水下可以井矣則雷在火下可以噬嗑矣風在澤
下可謂大過矣則雷在山下可爲頤矣雷在澤下可以
隨矣則風在山下可爲蠱矣澤上有水可爲節矣則山
上有火可爲旅矣雷在水下可爲屯矣則風在火下可
爲鼎矣水在火上可爲既濟矣則火在水上可爲未濟
矣澤中有火可以革矣則山下有水可爲蒙矣火在地
下可以明夷矣則水在天下可爲訟矣地下有水可爲
師矣則山下有火可爲賁矣澤上於天可爲夬矣則澤
下有水可爲困矣山下有天可以爲大畜矣則澤下有
地可以爲萃矣山在澤上可爲損矣則澤在山上可爲
咸矣澤上有火可爲睽矣則山上有水可爲蹇矣上天
下澤可爲履矣則地下有山可爲謙矣澤上有風可爲

中孚矣則山上有雷可爲小過矣山上有風可爲漸矣則澤上有雷可以歸妹矣此天地以對成之義陰陽反合之理故卦相次則反爻以成義易之八卦是也八八相生則錯卦以興理因而重之是也故聖人之道可縱焉可橫焉可合焉可離焉逆而陳之未嘗逆焉順而別之未嘗順焉三畫以變雖天地之數可無韜也九六相推雖萬二千五百之浩蕩不能踰於三百八十四三百八十四之糾紛不能踰於六十四重之以六十四不能過於八卦張之於八卦不能過四象紀之兩儀兩儀之理達而太極得矣故古往今來寒進暑退死生亂動是非滕結未嘗非兩儀也而未嘗離太極也故曰有寒有暑則兩儀不廢也無思無爲則太極未嘗遠也見之則兩儀忘之則太極夫然故不捨二求一未嘗離動以求靜未嘗離動以達靜也有可有不可非聖人之謂也無可無不可是夫子之心也然天下之理不可窮也天下之往不可盡也有窮盡之地者其唯聖心乎有窮盡之路者其唯聖言乎故據滄海而觀眾水則江河之會歸可見也登泰山而覽羣嶽則岡巒之本末可知也是以

貞一德之極權六爻之變振三才之柄尋萬方之動又何往而不通乎又何疑而不釋乎故孔子曰必也正名乎名者義之本也非聖人孰能正之哉若抑末執本研精覃思非聖人之書則不讀也非聖人之言則不取也庶幾乎神明之德可通乎萬物之情可類乎未之思也夫何遠之有君子可不務乎哉

平臺祕畧論十首

孝行一

論曰昔之列桐珪建茅土者非一君焉至于孝思可稱

仁風茂著存乎緇牒十一而已豈非生於深宮之中長於婦人之手膏肓積乎驕慢情奔淪乎嗜慾嗚呼有國有家者可不誠乎

貞修二

論曰美哉貞修之至也或抗情激操仗清剛而勵俗或理韻和神抱直方而守道或旌奇表善擢才於不次之階或剖滯申嫌措辭於難犯之地並能以禮升降以時舒卷既明且哲以保其身盛矣哉原夫御俗裁風變彝倫者寄乎直全身遠害得隨時者存乎變夫然故進不

王三少集 卷一 鄒氏刊
違義退不傷生清貞靜一保其道委迤屈伸合其度易
曰君子或出或處或默或語天下何思何慮同歸而殊
途百慮而一致此之謂也

藝文三

論曰易稱觀乎天文以察時變傳稱言而無文行之不
遠故文章經國之大業不朽之能事而君子所役心勞
神宜於大者遠者非緣情體物雕蟲小技而已是故思
王抗言詞賦恥為君子武皇裁勒篇章僅稱往事不其
然乎至若身處魏闕之下心存江湖之上詩以見志文

宣王有焉

忠武四

論曰陰陽代興剛柔合運威恩參用以成化文武相資
以定業况乎康侯自我宗子維城者乎城陽之權畧明
決卒摧呂氏之變任城之志意剛斷實啓有魏之業蓋
有助焉陳思雅懷忠勇義形家國表奏永昌洞曉兵數
績著疆場長沙武陵亦足云也

善政五

論曰東平以盛德匡時大興禮樂齊獻以至親統物光

王子安集

卷十

九

鼓雅居

濟中外淮陽安定峻必行之典安陸扶風深受遺之泣
能義行家國理極忠節使黃河如帶垂芳不朽盛矣乎
守方雅以調蕃政用公直而掌朝論昂然直上凜有生
氣衡陽太原亦足云也

尊師六

論曰前史稱良藥苦口而利於病忠言逆耳而利於行
豈非事情竭於不顧主色期於難犯中人以下罕免斯
累其有抗辭必盡忠烈橫匪石之心聞善若驚君王動
順風之請相須之際良可詠也清河之恭慎真懇雅爲

辭益上引聖朝下託師傅和矣哉

褒客七

論曰原夫重藝尊師登奇佇逸道存萬里神交一面故
有推輪擁篲寡人忘千乘之榮越席分庭上才當四海
之禮斯實藩邸之盛事間平之用心也而有矯情役智
蕩逸名利之間窒隙蹈瑕乾沒英翹之地便辟脂韋飲
其迹甘言巧辭運其辯假君王之顧盼用君王之威福
傳曰好善而不擇人則前代有以之傾矣至於興諧文
雅賞盡煙霞月庭廣闊風閨洞敞西園故事下蘭坂而

宵歌東苑遺塵坐槐庭而曉賦折旋書藝之園翱翔儼詠之隙洋洋乎亦為樂之一方也

幼俊八

論曰夫濫觴懸米翻浮天動地之源寸株尺葉擢梢雲蔽景之榦豈非積微成大陟遐自邇易曰山下出泉蒙君子以果行育德故考其前事備之于篇

規諷九

論曰夫陵谷好遷乾坤忌滿哀樂不同而不遠吉凶相反而相襲故有全中率行用心於不爭之場杜漸防微投迹於知幾之地昔之善持滿者用此者也諺曰禍不入順家之門前代有以之興矣至若中山激難重存親禮武陵變色復延情愛子建之陳辭貢憤長沙之發對因機雖亦各達其心未若洪慶之希聲也

慎終十

論曰詩云靡不有初鮮克有終若夫東平之奉憲遵約耿介原陵之奏中山之見賢思齊慙懃濮陽之託庶幾乎可為慎終矣至子塵之奉行文處文苑注中尉之遠述河間陳思尅已竝未易誣也

王子安集卷十

番禺林國賡初校
番禺沈葆和覆校

王子安集卷十一

頌

乾元殿頌

并序

臣聞鵬霄上廓瓊都開紫帝之庭鼇紀下清珍野闢黃
靈之館兼山配極照鸞闕於霞標薦水涵元湛驪宮於
霧壑斯則神徵語怪功潛鳥跡之初理涉非經道昧鶉
居之始授鳳書而稽碧落仙構罕存按龜錄而質黃圖
金模間起粵若風移處暗層巢恢火運之機業拒嚮明
上棟括河圖之奧三堦布政詠匪日於靈臺百堵陳詩

頌斯干於考室亦有黃軒瞰月譙門頽九洛之功璿闈
排烟牧野構三河之酷御燕臺而臨北極缺王度於祈
招列雲閣而拒南山隕皇謨於軹道然則卑宮喪禮采
椽輕四海之尊豐屋延災柏梁非萬乘之有雖因時立
事奢儉殊流而宏道在人興亡迭運靈光未造不窺九
室之榮景福宏規猶擁三方之釁瞻風舊史逮曹馬而
無譏觀跡故墟歷周隋而未得自我唐太陵遷構均五
方於鶴几之前中野凝圖調六氣於虬床之下坐圭臺
而清俯仰暑緯齊明臨鼎邑而重威靈風雷合響得元

功於大壯其至在茲乎我大唐雜渾指極樹神宰而制
山河鶴讖裁儀闢太虛而有天地黃精吐瑞潛龍苞象
帝之基紫氣徵祥鳴鳳呈真王之表高祖太武皇帝虹
星湛色開寶胄於金壺蛟電凝陰發皇明於石紐白蛇
宵斷行移海岳之符蒼兕晨驅坐邁雲雷之業屬東隣
委馭扇虐政於叢祠北拱隳尊紊皇圖於寶極蜚鴻集
野瞻烏鮮投足之因青犢嘯風羣鹿無擇音之所天街
五裂截鯨浦而飛芒地紐三分觸鼇山而按節元虬在
御掃圻甸而廓星都黃鳥分麾動扶搖而駭雲陣鑣宮

杖鉞跨高陌而登元轡野韜戈陟圮壇而擁號皇圖不
 恃聖人追卷領之風神器無私才子奉褰裳之運太宗
 皇帝雲房揖契壓麟璽於庭軒雷渚翔英擾龍鈴於高
 席一作周鑄八能亨運抗鷓邸而杖朱髦十亂恢基臨鶴州
 而擁黃鉞唐雲祕族潛開白水之徵代景迴輪光踐丹
 邱之運權輿象緯削茅社而建瓊祧草昧風雲席蘿圖
 而創璿歷紫庭合粹括宇宙於宸襟丹辰凝尊運陶鈞
 於寶思摘碧霄而鍊石上清耀魄之宮詔寰海而捐珠
 俯睇陽侯之室功驅偃伯頓鸚視於華封道被來王靜

龍吟於武庫元樞上運卜年開累聖之符丹竈昇遐遺
 範啟謀孫之畫皇帝陛下椒庭夔慶曜璿萼於霞莊蘭
 殿分休湛珠衡於月館道凝瓊鎮下蒼掖而照重熙業
 峻銅樓憑紫軒而揖羣后環四瀛於舜抱漏蟻覃津栖
 十景於堯衿巢螟荷照上元開籙寶龜定皇邑之模下
 武崇基飛龍錫帝臺之構貞明啟運齊玉鏡於鸞門易
 簡成功偃銅符於鶴仗懷降尊於襄野太階忘七起之
 勞念負重於焦原中席託三危之險臨翠嬀而則道天
 孕時成坐元扈而被圖神超物妙皇后星潯縱淑曳珠

紱於銅臬雲野疏祥抗瓊枝於桂浦素蟾登慶六虛充
牝馬之貞丹雀御林三雅合關雎之好璿宮夜靜居龍
幃而調元金房晨開御鴛階而緝化芝庭揖訓遠清和
鳳之儀蘭佩承風競峻當熊之節皇太子承雲紫座翊
八柱於乾維湛粹青衢揖三樞於地戶黃離踵曜太陽
分銑樹之輝蒼震薦音少海控銀河之色鶴笙飛奏想
丹駕於瓊山鮑俎捐芳齒元冠於寶序彤闈問暨禮崇
監撫之威黼席興賢義極君親之愛若乃東門卹允壘
仙構於熊山西苑承家導靈波於鴈沼桐圭作瑞鳳毛

曜丹穴之英茅壤分維麟趾冠元邱之俊異宮延粹闢
朱柱於娥臺兌野流芬疏紫蘭於別館頻隈毓範雲扃
分戚里之驪覃嶼疑規星閣絕郎官之請雕龍命職縱
跳澤而驤鱗翠鷄調司順義颯而撫翼月軒宵佇虞谿
降璿緯之精震帳晨披姜水洞金韜之蹟飛鶴書而抽
海狀桂壑於是投輪轉麟旆而揖山容松澗繇其削衽
軒圖瑞喬泛花綬於雞林農紀祥炎濯蘭纓于鳳水仙
臺俶務三珪銓棘序之風天秩調邦六府燮槐衢之典
金門獻納縱麟筆於苔牋石館論思覈龜章於竹槧淹

中訪禮蹲龍搖璧水之波稷下談經飛兔躍環林之秀
詞庭吐鳳翫鳥跡於春鬢書帳翻螢閱蟲文於夏閣杏
花千畝紺轅照磨蜃之功桑柘三宮元紱降親蠶之禮
圓邱上闢奉蒼璧於靈壇方澤下疑列黃琮於寶壇朱
絃翠瓚履霜懷四饗之尊複雷重簷涓日正三綱之首
五靈奔慶冠虵澤於黃樞六祀銜欣颺麟烟於紺度遺
弓積慕虔深太廟之儀執豆推恩道振明堂之禮瑤山
廣樂備逸調於宮懸洞庭仙奏納遺歌於帝府九韶分
唱后夔清桂序之音六變同和飛鳳掌梧軒之律樽俎

折旋之數苞舉陰陽堂庭節奏之規彌綸宇宙靈襟索
隱控風伯於詞林睿想鈎深詔天吳於筆海神窮獨照
傍探赤水之珍思洽幾深迴寫丹谿之韻金壇紫露映
銀籥而翻華瑤林白雪藻瓊章而吐絢蟬機撮化銅渾
將九聖齊懸虬箭司更銀漏與三辰合運爽鳩分職素
雲頽鳥喙之祥神獬關司元水照龍顏之側黃沙鞠草
剗叢棘而遷訛丹石滋苔仰甘棠而息訟融皋再稔方
聞外戶之謠昧谷千箱坐溢康衢之奏百城烟時望秋
露而乘風千室雲開合宵寔而組化彤幃獨選熊幡下

蘆鴈之祥墨綬分賢犀檢降槐鸞之祉筠驂佇信髦士
剖竹而相尋葦杖霑仁鮐叟攀輪而不暇龍蛇可踐野
人豐荷杖之驩雞犬相聞城尉輟鳴桴之響五雲抽潤
湛芳氣於璿臺六府成殷唱豐歌於銅闕不戒而昇東
戶恩周動植之津博施而舉南風化偃胎萌之寓神謀
備預嚴七萃於丹樞邃略防微肅千廬於紫衛元戎握
節黃公授犀闕之圖帝座聞輦元女薦龍庭之策頰柯
揮刃中權決勝於兩階白羽俄麾善陣推亡於四表朱
厓反景之域削虵弭於文樞黑山明月之鄉委龍琛於
武帳錦軒星駑控乾絡而觀風繡服霞驚浹坤紘而問
俗川浮沒羽鯨谿靜丹浦之虞陸薦飛毛熊嘯動青雲
之偵銀關驟雨望紫陌而趨恩鐵幌馳風計彤闈而瀝
思赤馬文援之寶叢積乎郊虞紈牛露犬之貢滿盈乎
儲邸青邱晝野不踰征賦之鄉蒼水奉圖未盡提封之
貫且夫緯武經文宏業也含幽育明至誠也混齊六合
大功也規模百代昌數也故能襲九空而寧庶物劃千
里而統諸侯休徵象德而動嘉符觸類而至風揚晷洽
藻乾慶於芳年司節河清藹坤禎於明渚瑶枝結慶泉

埃蕩玉葢之文瓊液浮甘天酒綴金莖之色黃蕤紫脫
湊仙穎於中畿翠蕙丹萸聳靈株於上序駢眸候日漾
影蒙池比翰翻風栖光理木祥飛并絡震鱗題瑞朔之
元祉綯新郊枵獸紀和年之序具靈篇之絕既究仙牒
之殊休天人之際交矣皇帝之道備矣繇是三靈物覩
扣蘭禁而棲誠九服子來詠蒿宮而騁力去奢去甚不
矜黃屋之隆匪樸匪雕方順丹墀之請宸規相宅考周
舊於靈都睿覽思和獲秦餘於正殿羣臣列陛奏蕭相
之遺模天子臨軒採荀卿之故事炎洲八桂筵仙拱於
林衡岱畎五松委靈材於梓匠衢宮記範萬機抗九戶
之尊海孽移琛千樂省十家之費飛廉卷靄徹烟極而
浮薨屏翳收津劃星墟而置槩瑤階百雉光懸寶露之
壇瓊壁萬尋影絳崇霞之閣拖虹梁而四注星漢虧於
上榮疊雲棟而三休寒暑隔於中雷雕楣鶴企杳勢分
規繡桷虬奔殊形別起圓璫布藻罄羽壁於狼泉方鏡
披蓮孕花化一作璣於蜃浦芝樓對幄薰傳五日之風芸
閣列錢彩鍛三旬之霧文疏罩迴陰兎息肩於綺寮翠
幌籠霄陽烏鍛翼於珠網豐隆按節下複橑而司階列

缺施鞭低叢楹而假道溫房佇幸煦芳景於佳辰涼室
乘閒凜徂颯於火序金鋪夕照若帝圃之輝瓊英寶綴
晨懸類阿房之聚銀燭烟邱碧桂翊珉陛而披香雨岫
頰筠夾璿流而颺影九衢翻翠雜仙卉於中達四照霏
紅間靈葩於右城神禽率舞光浮肆夏之軒瑞鳥相鳴
響叶鈞天之樂鈞陳宿列儼雙碣於丹青綺微霞周闕
千門於紫露爾其左扃崧鎮申侯降太室之禎前枕莘
郊伊尹發空桑之秀揭熊山而北眺貝闕猶存覩龜溜
而西分瓊臺易接總交中宇廓川陸而疏畿竟想善鄰
揆風霜而建野然則因秦構極祖宗耀金策之符作洛
恢基我后創璿居之始援天引聖隔代重暉橫紫都而
可襲配元宮而非遠故能使神光夜燭鏡麟趾於文除
仙泮晨華委鸞章於繡礎靈爻密發八方昭大有之和
寶篆潛開六合啟同人之會兩儀交慶虛碧墀而翹旌
萬宇披歡指蒼車而候蹕雖青蒲頌德東朝獻龍鳳之
圖而丹極鳴謙南面動貂羊之詔百神推策望璆徑而
虔誠三讓奉符顧瑤壇而肅事龜書吐瑞按五校而分
營鳳策揚輝翔八鸞而節步帷宮霧轉列芝蓋於中天

帳殿星離軻蒲輪於大野紫鱗充饋若大帝之共臨素
鶴翔華類羣仙之廣宴花開瑞雪委瓊饌而調芳綵絢
祥雲夾珠旗而曳影功推三祖銀繩勒東岱之威業峻
一人金筴奉南山之壽道旣成矣元符集矣代旣貞矣
元勳緝矣運三辰而虛玉柄風兌渙其中孚懸五禮而
偃金科雷坎光其作解奔烽舉爵溢仙酒於中衢疊鼓
分餉浹宸輝於下里吞九重而上運控八聖而遐征翔
赤驥而睇風區吟翠虬而掩霄甸隱隱轟轟雷動天驚
回輿斜眄而降乎乾元之殿司宮庀職肅坻堦而神行
掌舍巡方煥巖廊而洞啟赫若朱螭負漢而輝橫海之
鱗默若蒼鵬架壑而振垂天之翮千官曉次傚銀榜而
端簪萬戶宵披侯瓊膏而肅帶靈戈列陛天官具三揖
之儀雲輅充庭宗伯寅九賓之禮瑤鯨戒響懸猛籟於
端闈銅狄分形肅嚴扃於左序排紫微而立極宸儀冠
明后之三俯黃道而披軒仙歷用乾元之九蕩蕩乎何
聖人之無外巍巍乎而神功之不窮也臣勃席芳十步
企景三冬雖承宣室之談猶窘靈臺之影仙壇遠祕已
多謝於祥鸚大厦初成復攀榮於賀雀慨深梁甫終乖

捧日之歡恩一作思極甘泉未動凌雲之價神圖不測固

流絢於丹騰微志可存庶鑄芳於翠琬敢獻頌曰

紫局垂耀黃樞鎮野銀樹霜披珠臺月寫嚮明立極橫

神廓社大壯摘爻斯干韻雅其鶉居化沒狙訛道長瓊

構霞明璜軒露徹棄人崇欲違天蠹象南巢不救東隣

長往其瑤緘考懿金板藏功道凝茅屋業盛蒿宮龍階

察禮鵠閣調風推訪華禮酌儉思冲其懸黍結夢傅翼

生災千薨嶺接萬栱星開爭圖絢侈福極凶來風寒碣

館露慘蘇臺其十館瑩秦金房砥室干間架漢韜雲閱

日濟惡承危同亡異術傾駟未遠遺墟繼出其龍川結

禍鶴塞稱符塵驚八際霧慘三都穹廬寶極劇幕璿樞

司宮墜典掌舍淪圖其蒼衢毓祉丹邱表聖鳳矯仙樞

龍迴寶命道疑金冊功馳玉鏡紫氣抽華黃暉疊映其

神稽鶴識迹播雞渾重光累極翼子謀孫經天緯象就

日提元鸞軒湛粹鳳几裁尊其祥抽紫歷業照彤管珠

雀朝翻仙蟾夜滿丹墟獻跡青臺墜卵椒闔儀風芝閨

奉款其九登三建緒明兩開儀龍譙霧鬱鸞禁霞披浪分

璿渚景峻瑤枝黃扉曉列丹轂宵移其龜文獵彥麟旌

收逸桂客攀榮松賓改律紫鷓開紀丹虬聳秩縱壑搏

颯登山捧日其十功融棘序道備槐庭不仁者遠惟道

斯行烟搖墨綬電轉朱軒境懷春翟野散秋螟其十鄭

竹分科燕棠輟諷銅機化極珠囊業洞禮貴丹虬樂調

朱鳳珠垆獻寶綿鄉委貢其十龍闕靜析鶴塞投弦歌

呈豹尾舞進鳶肩銅鏡月斤鐵輞星懸繩幽架險驛霧

馳烟其十霧壇凝紫河宮湛碧翠蕙翻颯丹萸候魄霜

均電散連珠契璧藹蓋籠霏花衢墜液其十年和政美

化極風調靈臺軫詠考室興謠循圖訪典去秦捐雕道

存南面讓屈東朝其十望雲裁構籠霄建宇方鏡星離

圓璫月聚梓匠傾思林衡授矩畫栱栖烟文軒架雨其十

七芝房疊翠桂廡流丹霞張萬戶霧葺千巖重局駐煥

洞牖栖寒神加有叙貺入無端其十帝圖臨御皇僚萃

止電戟揮霜雲旌拒晷紫宮可逼黃街易履鳳礎騰文

麟庭抗禮其十珠泥暢績銀繩鬱契鶴嶺雲明龍壇景

惠道超中古功推下濟惟帝惟天惟天惟帝其二十

拜南郊頌 并序

微臣上稽龍繇下閱龜謀觀天地之至道考皇上之大

節武宣七德未嘗踰息亂之鄉文招九功未嘗出昇平
之域並能懸日月而高視駕雷雨而先鳴或皮幣而踐
天階或干戈而躡乾步至於理定創禮功成作樂振長
策以叙諸侯設靈機而制羣動猶虞階已泰不能息洞
庭之誅夏載克寧不能罷會稽之戮故將體剛柔而立
本法震曜而崇威一戎而寓縣平四罪而華夷服然後
黃旗大輅詔殊號於圓邱電轉星迴奏元符於孝理天
下黎人知四海之安樂寰中殊域奉三靈之康泰德兼
祥風灑道與和氣游不言而大寶用貞無事而元功有

立捨彼代也其誰與哉若夫應運而生繼天而作鼓動
千載之下超騰百王之上遂能發軒庭之景曜躡隋運
之頽風揖讓而取文明指麾而清函夏則我皇唐得之
矣高祖以黃旗錫瑞靜雲火之橫氛太宗以赤羽登期
補星辰之絕縷授瑤圖於新邑付璿歷於均臺人更三
聖道昭千古於是俛臨睿極趨四荒於鳳闕之前端委
廟堂調萬國於龍軒之下八鸞徐動頓湯文於後塵九
駿長驅佇堯舜於中路邦家之具得矣易簡之業存矣
猶有朱蒙戾俗違光蓬艾之間青徼遺毗假氣陶鈞之

內背熊山而構虐擁狼潭而稽誅竊瀛海之風波弄乾坤之綱紀漢圖西返惟收五都之名魏律東窮未出三韓之險姦謀蓄於有漸逆節成於不悔長蚊蚋之雷霆附豺狼之羽翼豈知夫至人無外撫天下以爲家真數有歸弔羣方而罪已三門遁甲黃公成不戰之師五壘神兵元女下先登之策肅牙璋而按律輝旄節而分麾降南宮之元老裂西營之毅卒良將首路偏戎竟野軸轡萬里旌旗四合金箱玉匱司空憑百勝之威鸚視龍趨將軍仗萬全之略負鼇邱而峻壁據龜壑而深溝一

鼓而亭塞無塵七縱而江山失險伐罪以明而不以眾懷遠人於絕境均惠化於殊鄰登若木以照臨折紅桃以延佇然後分州列鎮對明月以收營返旆旋戈部元雲而振旅望神都而獻捷仰靈社以書功辛亥謁於昭陵癸丑告于太廟時乘黑帝月旅元枵大唐有國之五十年皇帝有天下之一十九載也元惡旣殄萬宇清矣元勳旣輯萬寶成矣以爲周郊上帝裁延肅慎之賓漢禮甘泉木拯朝鮮之亂想元功而反側奉先旨以遲迴思答上靈之心以洽庶黎之望爰考吉日遂淨行宮

有司具典乘輿乃出撫元蚪戴翠鳳鼉鼓按節鯨鐘疏
響千乘嶽動萬騎林迴星陳而天行雷震而霧合是時
未登夫泰壇也迺齋帷宮宿帳殿華蓋移影鈎陳從蹕
千營夕布亘蒼野而烟凝萬幕宵懸背黃闥而霧列旣
而屏翳清曉飛廉警旦孫叔奉轡王良聳策雲藏星謐
宇曠山明旌軒具照簫笳互凝陟名嶽以告成歷神邱
而展事國容象物而動朝章視令而肅宸儀有睟虛徐
大帝之庭列侍無譁髣髴華胥之國于是襲衮服戒俎
豆端瑞班儼華旒樂懸六代禮備三古奠惟蒼璧藉用

白茅鳴孤竹之簫管奏空桑之琴瑟感格以誠不以事
動植咸驩敬神以道不以華天人合應然後駐聲名於
上邑反文物於仙宮因雷雨而作施法雲天而用饗風
行電舉未注景而浹九埏野怵途歌不崇朝而晏六合
我之元極乎矣我之能事畢矣趨帝寰而振足越皇衢
以驪首不其休哉雖睿化無方比神圖而絕唱而小臣
不佞撫洪筆而當仁敢作頌曰

遼河巨浸碣石危峯城分元菟塞接黃龍憑遐作梗恃
險忘恭人殘鬼哭主闇臣兇有晉不綱戎麾內逐帝陪

失御皇輿外驚九縣塵征三靈霧黷長茲下慢逋我天
戮五材無隕干齡有聖武創元基文清寶命波恬四海
明宣七政息眾以寧綏荒以令飛龍繼跡鳴鳳重光遂
均夷夏迭用柔剛戈船泛月劍騎橫霜風驅海石電掃
辰陽帝師無戰神兵有伐丞相陪麾司空仗鉞危雲旦
起長星夜發萬壘爭屠干城自蹙功超薄伐義極兼該
殊方底定善陣徐迴歸俘獻捷課績分材建侯清廟偃
伯靈臺考事龜謨凝情鳳展仰觀俯察享神作祀道則
推天功非在己豐隆旦出招搖夕指神壇嶽立齋館雲
深鑿旗曉引葆吹晨吟山明野徹日隆天臨鏘鏘盛服
肅肅珪簪俎豆畢陳笙鏞間撫玉觴分獻金罍暢矩青
帝鳴琴朱靈會舞上和下悅神歆神聚收驩巨野反旆
靈躔恩周宇宙樂極寰埏德因時立頌以詞宣帝之功
也臣何飾焉

